

6 poemas

Pilara SANDINIÉS ARA

1

Bista tresbatida en l'orizón

Ixa fosca immensidá d'a tuya
güellada sospira
en l'universo
entre que dandalías
ta rebilcar-te.
Tu
has bista la mar
entre cotons
cosirando
por as fondas fozes d'arena.

2

Ya piulaban as tordetas
cuan plegaba a primabera
porque no teneban argumentos
ta charrar d'a libertá.
Y l'arizo s'arizona
por no brindar en a brenda
d'os cazataires muertos
d'un torzón atorzonaus,
baxo as ruedas redoladas
d'esclaters claus asesins.

3

Enta tu m'amano güei,
enta la bolisa calién d'o tuyo aimo,
enta la nuestra garchola d'o pasau,
enta las nuestras pasions d'o presén,
enta lo esdebenidero, siempre esbiellau,
enta la nuestra ziudá sin de pantasma,
enta ixe común pasau sin de pasar,
enta la farga d'o nuestro sentimiento,
enta lo tuyo riso, enta lo tuyo sorriso
horizontal, bertical, de bislai,
enta o tuyo zentro bital.



4

A falzeta, bidua y beloz
s'enreliga en un danze
estibal, imprebisible.
As abetochas tremolan
fendo contraste en bel paisache
de tascas imposibles.
Apercazamos o conformismo
d'o trigo; adempribiamos
o inconformismo de l'ababol
que luita contra una tiranía
incontestable y rebordiza.
Os choplos asienten aconortaus
zaga la rexa parda d'o balcón.
Ye primabera zaga os baroz.

5

España, camisa blanca,
ni roya ni gualda,
ni royigualda
ni cosa; aguar-te
que biene y que m'espanta;
no te cosiro, sí te malquero,
fuijo de tu como de laquia,
y sidenbargo mos queda l'asperanza
de que te regales sin de rudios,
amonico, con buen son,
que t'esbafes china-chana,
t'enreligues plurilingüe
y t'eslurtes por as rallas
d'os tuyos alavez imperials.
A cascar-la!
Au!

6

A lo Chil-indrón

Un macatrullo faxista
me quiere acotolar
y no me dixo, m'escotolo,
fuijo y li chilo palabrizos,
un diya sin d'atro: malcagau
dechucáu, sinconisión
malalparcau, animalaz,
garrastuertas con pistolón,
sanselaz, papis d'esprito,
malfarchau, piazo güeña,
escodau y cuasi espantau,
bezibersiau, au enta o fiemo,
maldau te libre por as ripas,
y a la fin cosa te digo
porque ye malmeter baba.